

東

華

錄

東華錄

康熙九十二

臣王先謙敬編

臣周澗瀾蕃恭校

秋七月庚戌宗人府奏三等侍衛尼雅罕奏伊曾祖飛揚古於
太宗文皇帝時曾革退宗室祈查明增載玉牒臣等查檔案內並
無宗室飛揚古之名應否載入玉牒請旨定奪得旨尼雅罕曾祖
飛揚古乃太祖皇帝之子朕知之甚確但不知爲第幾子太
宗皇帝時飛揚古因獲大罪正法年久之事既無檔案朕亦不便
遽定其尼雅罕著給以紅帶並伊祖父之名入黃檔內載入玉牒
記載時卽將此情由錄明於後○王子宗人府奏臣等遵奉諭旨
將革退之宗室覺羅等子孫分別給紅紫帶續載玉牒查革退宗
室內除原任和碩睿親王多爾袞無嗣無庸議外其原任貝勒莽

古爾泰德格類和碩英親王阿濟格貝勒碩託鎮國公艾都立貝勒拜音圖貝子鞏阿岱西罕濟麻護多羅郡王阿達禮和碩莊親王舒爾哈齊等子孫共二百一十六人俱應給以紅帶記黃檔內纂修玉牒時一併載入又宗室阿爾通阿之子孫四人見入覺羅紅檔無庸另議應將阿爾通阿之名補入黃檔內增載玉牒其覺羅勒爾森昂阿拉吳丹等之子孫共二十九人俱應給以紫帶記紅檔內一俟纂修玉牒時一併載入又定例覺羅等所生之子設稽查幼子之員咨送宗人府惟宗室等所生之子各從本家咨送恐有遺漏嗣後請照覺羅例增設稽查幼子之員將宗室等所生幼子徧查咨送免致遺漏得旨依議此等宗室覺羅等載入玉牒黃檔時亦照尼雅罕例各書於後○乙卯諭大學士等部院官員內能辦事者有之但尙多疏畧之處朕當繁劇時日閱二百餘本

曾無一字疏畧今閱二三十本更覺寬裕矣昔年少時步行四五
十里今雖年高尙可步行十餘里可知凡事皆在留心歷練耳又
諭朕於算法律呂等書探究本源今已明晰如黃鍾爲最要凡數
學以及斗斛尺度無不繫乎其中也○大學士九卿等遵旨覆奏
偏沅巡撫潘宗洛行事糊塗材畧平常不稱厥任 上曰此事俟
回鑾時再奏○庚申四川茂州及平番營地震賑之○辛酉諭大
學士等朕十三歲親政時有援引恩詔誤赦一人者曾以此事問
原任大學士李蔚李蔚奏云業已誤矣聽之使朕諭曰有人可聽
其誤若殺人亦聽其誤可乎李蔚不勝懼忭奏云皇上此諭誠可
昭垂萬世又輔政大臣共理政事時紅本已發科鈔有取回改批
者馮溥爲給事中奏云凡一切本章既批紅發鈔不便更改輔政
大臣等欲罪馮溥朕以馮溥所言亦是因嘉獎之並諭輔政大臣

等此後當益加詳慎批發且昔聽政時每令讀本朕與輔政大臣共聽之或因一時言論往往忽畧朕諭伊等此內有關係民命者尤不可不慎伊等皆經行間效力不以殺人爲意朕必慎焉但懲惡所以勸善亦有不可寬宥之處聖人法內有仁惟仁者能好人能惡人朕於此尤加詳審從無少忽也○乙丑予故原任四川提督岳昇龍祭葬○丙寅 上行圍發熱河

八月丁丑先是鄂爾多斯王松阿喇布奏請於察罕託灰之地暫行遊牧遣尙書穆和倫等往勘定以黃河西河之間柳墩等四臺爲界並設理事官二員稽察遊牧蒙古禁止生事甯夏總兵官范時捷奏言察罕託灰係版圖內地今蒙古遊牧多致越界行走與甯夏居民蒙混樵採實屬不便請以黃河爲界停止蒙古遊牧則民生有益卽地方亦易防守 上諭理藩院曰前松阿喇布以察

罕託灰水草佳茂懇請暫行遊牧並未有令永遠遊牧之旨此事
著爾衙門員外郎莫禮布前往查明具奏至是莫禮布回京奏稱
鄂爾多斯蒙古見在遊牧漸至賀蘭山下與原定之界實係踰越
奏入下九卿會議一議察罕託灰本屬版圖內地因前遣尙書穆
和倫等勘定以柳墩等四臺爲界故將察罕託灰許令遊牧今蒙
古等越界行走應行文地方官卽查明越界蒙古逐出柳墩等四
臺之外其察罕託灰遊牧之處應否照穆和倫等原議請旨定奪
又兵部尙書殷特布等一議黃河西河之間草木極盛甯夏居民
藉以樵採若令蒙古遊牧與居民混雜行走洵屬未便又察罕託
灰與甯夏相近旣許蒙古遊牧則地方汛防不無艱難之處應如
范時捷所請改定黃河爲界於民生地方均有裨益得旨從前原
以黃河爲界著照後議行○辛卯戶部議准御史李景迪奏京師

五城地方設立司坊官共十五員所居房屋各極宏敞每年租價約合計之幾至千有餘兩司坊官私派總甲總甲私派居民甚至供輸不給有追呼紛擾之弊請敕裁革嗣後司坊官等所居房屋皆令捐俸自租不得私派累民從之○庚子以雲南布政使李華之爲太僕寺卿○是月免福建侯官縣水災額賦

九月己酉 上駐蹕博洛和屯賜來朝外藩冠服銀幣鞍馬及隨

圍蒙古官兵銀幣○庚戌以李濤爲左副都御史

由宗人府府丞遷

○辛

亥 上還駐熱河○丁巳 上奉 皇太后自熱河回鑾○甲子

上奉 皇太后還京師○丁卯 上問尙書張鵬翮曰四川巡

撫年羹堯居官何如張鵬翮奏曰聞年羹堯在地方實心理事

上又問曰操守如何張鵬翮奏曰臣於本籍來京之人概不接見知之不確 上又問曰爾前往浙江審事巡撫王度昭居官如何

張鵬翮奏曰王度昭於地方事尙能留心 上諭九卿等曰王度

昭初莅浙江時聲名甚佳後因保題屬員聲名頓減天下督撫內
惟額倫特張伯行操守最優劉蔭樞亦佳爾等俱爲大臣天下督
撫之賢否貪廉俱應平時留心細訪以備顧問秉公陳奏雖門生
故舊不少徇庇庶督撫等皆知畏懼而勉勵矣乃往往朕有所諮
詢或謂未經同署辦事或自謂平日不接見人知之不確以此推
辭殊爲非理爾等知福建布政使李發甲居官如何大學士等奏
曰李發甲居官聲名好 上曰潘宗洛任湖南巡撫後不及爲翰
林時著革退福建布政使李發甲著升補湖南巡撫○庚午諭大
學士李光地朱子全書四書註解刊刻告竣可速頒行又諭孟子
云排淮泗而注之江朱子謂淮水不入江古今水道不同當時淮
水或有入江之迹後湮塞亦未可知李光地奏云 皇上此論誠

發千古所未發也 上曰爾傳諭九卿有明於性理實學之人令其各舉所知○辛未以江南漕米十萬石分運廣東福建平糶○甲戌大學士等以科道內升外轉請旨 上曰言路不可不開亦不可太雜明朝國事全爲言官所壞今之進言者輒云某爲上所喜某爲上所惡每揣摩朕意私心窺伺以圖迎合朕並無所愛憎之人其居官善者則愛之不善者則憎之耳卽如噶禮居官如此不善不但無一人劾奏反有從而舉之者後噶禮與張伯行互參差往審事滿漢大臣謂朕意有偏向故審理俱不公平朕亦不露意旨直至議定奏聞方向九卿明諭於是眾乃知朕無偏向之意大凡人臣事君之道公爾忘私乃爲正理且性理諸書中亦不過辨別公私二字事君者果能以公勝私於治天下何難若挾其私心則天下必不能治今科道於內外官亦有明知其不善者或其

人有所倚仗或其人素有聲勢不可搖動遂莫敢參劾亦由學淺
膽小故爾爲清官者惟潔己不要錢猶是易事若論公爾忘私誠
爲難得科道官員內朕無深知者今條奏亦稀將伊等照例挨次
升轉可也○定錦州水師營經制○先是隨從二阿哥允禔之得
麟爲人狂妄奉旨鎖禁在家因伊父阿哈占補授 福陵關防時
奏請將得麟帶往奉天旣而得麟之叔佛保奏得麟怙惡不悛請
交奉天將軍正法 上命交伊父阿哈占將得麟處死伊父阿哈
占及伊子白通詭稱得麟自縊身死潛蹤逃匿 上察知其詐遣
刑部員外郎納齊哈等至山東膠州拏獲得麟付法司會勘至是
刑部等衙門覆奏得麟係屢犯重罪奉旨處死之人乃擅行悖旨
假死逃匿情罪可惡應照大逆律將得麟凌遲處死其父阿哈占
雖已身故應開棺戮屍得麟之子白通擬絞監候其逃匿地方文

武官失於覺察應行令該撫查參議處從之○是月免浙江臨海等七縣衛旱災廣東三水等五縣水災額賦有差

冬十月乙亥朔以段志熙爲浙江布政使

由雲南按察使遷

○丙子戶部

議覆原任偏沅巡撫潘宗洛奏請墾荒展限應行文接任巡撫查明詳議 上曰凡督撫條陳地方事務應據實陳奏潘宗洛奏湖南荒田五百餘頃今天下戶口甚繁地無棄土湖南安得有如許未墾之田著差戶部司官一員會同湖廣總督額倫特就潘宗洛奏疏內所有州縣查勘詳明具奏又諭湖廣陝西人多地少故百姓皆往四川開墾聞陝西入川之人各自耕種安分營生湖廣入川之人每每與四川人爭訟所以四川人深怨湖廣之人或有田地開墾至三年後躲避納糧而又他往者今四川之荒田開墾甚多果按田起課則四川省一年內可得錢糧三十餘萬朕國用已

足不肯加徵且先年人少田多一畝之田其值銀不過數錢今因人多價貴一畝之值竟至數兩不得卽如京師近地民舍市廛日以增多畧無空隙今歲不特田禾大收卽芝麻棉花皆得收穫如此豐年而米粟尙貴皆由人多地少故耳朕巡幸時見直隸自苑家口以下向年永定河衝決之處今百姓皆築舍居住斥鹵變爲膏腴不下數十百頃皆未嘗令起稅也又江南黃河隄岸至所隔遙隄有二三里者亦有六七十丈者其空地先皆植柳以備河工取用今彼處百姓盡行耕種亦並未令起課昔河泛漲時水常灌入遙隄不得耕種自清水暢流以來河底刷深水必長至二丈方能及岸遙隄以內皆成沃壤矣大凡濁水與清水合流方可無壅決之患如直隸永定河一交冬令乃漸涸或有壅沙高出河身及夏秋水發不由故道而行遂至潰散淹沒田廬朕詳度河工情形

引莽牛河之清水入於永定河春冬之時雖水小不能行舟而仗此引流故道不至壅淤及水發時清水合流水力甚大故河底刷深無衝決之患矣又去年趙申喬條奏黃河近邊被衝田畝請查明數目蠲免錢糧不知黃河東岸刷則西岸之田出西岸刷則東岸之田出被衝之田應免錢糧則新出之田不應取錢糧乎今年浙江提督吳郡陞見時朕諭吳郡云聞浙江海中漁船甚多其船進海口時防汛官兵橫索錢財方能入口中有不聊生之窮人不得入海口遂爲海賊觀此則海賊卽內地漁人乃官兵迫而驅之海中爲賊者也朕下此諭旨特欲使提鎮等知朕於各省事無不洞悉也今遣官勘驗湖南荒田亦此意耳總之督撫不可侵部院之權部院亦不宜刻求督撫之非凡事宜用中不可一偏也○轉張鵬翮爲吏部尙書以趙申喬爲戶部尙書劉謙爲左都御史

工由

部右侍郎遷

○丁丑以沙木哈爲福建布政使

由四川按察使遷

年希堯爲廣

西按察使

由直隸大名道遷

○庚辰諭大學士等御史周祚顯條奏百姓

保留地方官員督撫代爲奏請應行禁止其言甚是頃口外青城地方有二百餘人叩闥保留萊州知府朕未准行後又至熱河叩闥止五六十人朕疑之因令拏審果係見居口外之山東民人爲知府家人雇覓指使而來耳凡有百姓糾黨保留地方官者若准留任則官必爲民挾制實非美事且令民不畏官官不畏其上司關繫匪輕故宜留意清官或倚仗廉潔不畏上司而貪官被參之後亦謂我不能迎合上司所以被參學爲清官之語自飾朱子畏大人註云大人理所當畏國家有上下貴賤之體雖清官可不畏上司乎○禁八旗舊有養子其子孫互相勒詐誣告者○先是御史董宏彪保舉山西冀甯道彭騰翹上命大學士等傳問九卿

至是九卿覆奏彭騰胡聲名不佳 上曰朕知彭騰胡向來奉職不善九卿因朕問及不得已乃行舉出天下官員甚多朕不能盡識雖識之亦不能確知其爲人然後問於九卿九卿宜一意秉公據實舉奏今觀九卿大臣率多苟且謂何必與人爲仇不肯直言人臣居官一日則當盡一日之職若互徇情面不實心辦事事何由而得理殊非臣道所宜然也且科道者耳目之官九卿保舉不公卽當糾參又科道有互參之例今伊等惟有所倚恃始行題參耳董宏彪彭騰胡俱著革職○癸未以荆山爲禮部右侍郎由大理寺遷崔徵璧爲工部右侍郎由左副都御史遷○乙酉殿試讀卷官大學士等遵例以試卷十本進呈 上閱至第二卷曰此卷必係南省人命拆視之果然 上一一閱畢諭大學士等曰爾等大臣多係進士出身深知文字況文章書法各有所習一覽可知朕適閱第二

卷未及拆封早知爲南省人昭然不爽聞來京應試之人將伊等所作文字各處投送其應開考試官悉令過目以博己之聲名以求人之採取爾等場中閱卷當一秉虛公畧無私意始稱厥職至五經四書俱係聖賢之言考試出題專意冠冕者則題目漸少士子易於揣摩甚有將不出題之書刪而不讀尙得言學問乎經書內有不可出之題試官自然不出其餘可出題之處須以各種題目試之則懷才實學之士自無遺棄矣○丙戌賜王敬銘等一百四十三名進士及第出身有差○丁亥以呂履恒爲左副都御史

出宗人府
府丞遷

○庚寅諭九卿等朕念福建廣東沿海州縣值此青黃

不接之時宜酌量蠲免張鵬翮奏曰頃蒙 皇上特加殊恩已令

運米賑濟矣且連年蠲免甚多見今動用至康熙四十九年錢糧矣 上曰卽動用至五十年錢糧有何妨礙今米雖運去但足餉

口不能辦錢糧也朕心惟以百姓爲重蠲免之事不可遲延○諭大學士等翰林官員內多有不識字義不能作詩文者此皆教習不勤之故比年以來武英殿行走之人鄉會試中式甚多蓋以在武英殿行走每日不釋卷耳此後凡修書校書處著並派庶吉士又諭道學者聖賢相傳之理讀書人固當加意然詩文亦不可廢或有務取道學之名不留心於詩文者此皆欺人耳○庚子以劉曾爲雲南按察使由驛鹽道遷王沛檀爲四川按察使由建昌道遷○辛丑以拉都渾爲理藩院右侍郎由內閣侍讀學士遷○癸卯諭大學士等朕覽朝鮮人所作文章佳者甚少彼所用者皆中國方域之名卽如稱道路之至險者或井陘或棧道見今疏治悉成坦途何險之有彼但據舊時書籍所記未經身歷宜其不能工也朝鮮國王甚恭順知禮卽我朝所遣使臣亦皆守分一切餽遺未嘗需索明代遣一

使至彼國費用動至數萬此尙可爲撫遠之道乎○諭翰林官關
繫緊要必讀書立品方稱厥職今翰林官甚多朕皆不識自講讀
學士以下編檢以上滿洲漢軍由進士選入翰林者其中或有不
修行檢日事飲博於詩文書法全不究心又或督學典試分校聲
名不好者爾等會同九卿詳察舉出卽行黜退各省皆有翰林九
卿豈無聞見毋容徇隱其見散館庶吉士及教習進士內有此等
人亦舉出革退

十一月乙巳朔 世祖章皇帝淑惠妃薨輟朝三日○己酉諭戶
部朕勤求民瘼無間遠邇雖在邊徼偶有旱澇災傷無不訪察情
形殫思賑救今直省俱獲收成惟廣東福建甘肅共有二十一州
縣衛夏秋被收雖各省地丁錢糧新經全免然一方災歉悉廩朕
心艱食之際重以追呼朕所不忍其被災各縣衛明年稅糧盡予

豁免俾民間無催徵之累肆力東作用稱朕撫恤災黎至意○癸丑諭大學士等近見直隸各省考取武進士額數或一省偏多或一省偏少皆因不知其弓馬武藝止憑文章取中以致騎射嫻熟諳習韜畧之人多有遺漏嗣後考取武進士不必拘定額數俟天下會試武舉齊集京師令該部將各省赴試到部武舉照例考試弓馬將合式武舉實數查明豫行奏聞朕計省之大小人之多寡照考取文進士例按省酌定取中武進士額數考取時就本省卷內擇進佳者照所定數取中如此則學習武藝弓馬優長者不致遺漏矣○甲寅諭大學士等文武考試雖曰兩途俱係遴拔人才而習文之內亦有學習武畧善於騎射者習武之內亦有通曉制義學問優長者如或拘於成例以文武兩途不令通融應試則不能各展所長必致遺漏真才嗣後文童生生員舉人內有情願改

就武場考試者武童生生員舉人內有情願改就文場考試者應各聽其考試如此則各得展其所學文武兩途皆得真才矣著九卿詹事科道議奏○丙辰賜宋如柏等九十六人武進士及第出身有差○丁巳 上謁 陵啟鑾○調常泰爲左副都御史

由內閣學

士○己未先是 上諭宗人府從前 淑惠妃發引朕之諸子俱

步行恭送聞公普照等在後乘馬而行隨從之人皆曾共覩年老大臣內或因殘疾乘騎者有之普照等係年少之人如是僭妄爾衙門不行查參恐滋流弊爾等應將是日乘馬往送之人確查舉奏至是宗人府奏臣等查從前 淑惠妃發引時公普照貝子蘇努公星海登色額爾圖吞珠門度賴士等俱各乘馬往送甚屬不合請將伊等嚴加議處得旨普照星海著革職禁錮宗人府另擇襲封之人承襲其蘇努等六人皆已年邁著從寬免議○壬戌以

徐元夢爲內閣學士

由內閣侍讀學士遷

○癸亥

上謁

暫安奉殿

孝

陵至 仁孝皇后

孝昭皇后

孝懿皇后陵奠酒○于故原任

吏部尙書宋榮祭葬○己巳四川陝西總督鄂海奏蜀省建昌至

東川一帶盡係深山世居苗人今有苗目阿木咱率眾投誠共計

三千一百二十五戶下所司知之○壬申 皇子允祁生

十二月己卯以赫奕爲工部尙書

由內務府總管遷

舒蘭爲工部右侍郎

巴濟納爲內閣學士

由大理寺卿遷

○于故左副都御史郝惟諤祭葬○

甲申

上駐蹕熱河○丁亥

以鄂齊珥爲內閣學士

由內閣侍讀學士遷

○

辛卯禮部等衙門遵旨議覆文武生員舉人有願改考者准其改

考 上曰改考實係佳事但恐武生記文數篇希圖僥倖者多學

臣於文生員公取者或有之至武生全無公道矣此弊朕皆知之

嗣後由武考文不中者若再令考試則弊生矣應許改考一次其

不中者應著停止○刑部尙書哈山侍郎王企埭緣事革職○王

辰 上還京師○癸巳免甘肅會甯等四縣衛旱災額賦發粟賑

之○甲午以劉榮爲四川布政使由江西按察使遷許兆麟爲四川按察

使由川東道遷○轉舒蘭爲工部左侍郎以常泰爲工部右侍郎由左

仙史以巴濟納爲盛京禮部侍郎由內閣學士遷李濤爲刑部右侍郎由左

副都御史遷○湖南巡撫李發甲丁母憂命回籍守制○追給巴圖魯

額亦都一等精奇尼哈番世職以其孫尹德襲順科洛巴圖魯安

費揚古三等阿達哈哈番世職以其曾孫明泰襲巴圖魯鰲拜一

等阿思哈尼哈番世職以其親弟之孫蘇褐襲○是月免福建甯

海等三縣旱災額賦有差○是歲朝鮮琉球來貢○人丁戶口二

千三百五十八萬七千二百二十四又永不加賦滋生人丁六萬

四百五十五田地山蕩畦地六百九十三萬八百八十九頃六十

九畝有奇徵銀二千一百八萬九千六百五十八兩五錢有奇米
豆麥六百九十二萬五千七百七十五石有奇草四百八十七萬
八千六百八十五束茶二十三萬九千五百三十六引徵課銀三
百七十三萬九千九百五十六兩有奇鑄錢三萬七千五百六十
二萬九千八百有奇

東華錄

康熙九十三年

臣王先謙敬編

臣周綸蕃恭校

康熙五十三年甲午春正月己未九卿議覆大學士等奏 皇上以天地生成之心爲心每遇讞奏命案再三審詳曲加矜恤五十餘年閒仁恩寬宥者不可勝計是以太和洋溢祥瑞疊見今歲在甲午乃 皇上聖誕本命之年請以康熙五十三年立決重案緩至五十四年行決軍流以下人犯除情由可惡外平常罪犯酌其輕重量子減等等語應如所請今年重罪人犯停其正法暫行監禁其平常罪犯酌量減等完結得旨此事關係甚大所犯輕罪猶可犯十大惡兇亂之人情實卽宜正法又各省州縣拏獲強盜仍有越獄逃脫者此等兇徒豈可監禁又待一年乎著再議具奏○

東華錄

康熙九十三年

命重修各壇 廟宮殿樂器○癸亥戶部奏禁用小錢限期已滿見今大錢不敷用度請將小錢再展限三年與大錢兼用 上曰爾等所見甚善自古錢法未有如本朝流行之廣者如宋時錢至元末尙有元時錢至明末尙有惟本朝不但順治錢於今已少卽康熙初年之錢亦少前者湖廣總督額倫特來奏湖廣一省小錢甚多若將大錢二百萬貫運去收買小錢則小錢可盡矣朕諭爾但知一省之事未知天下之事以二百萬貫錢運至湖廣能保途閒無不測之事乎伊愕然奏稱上諭甚是臣實意料不及總之錢法以期便民若不計便民而但期法之必行嚴加禁止亦有何益凡事必酌量權變不失其宜方有濟耳○甲子文華殿大學士溫達以年老乞休溫旨慰諭以原官致任○以賴都爲刑部尙書○以李錫爲偏沅巡撫○戊辰 上巡幸畿甸啟鑾

二月甲戌九卿等遵旨議覆凡一應立決人犯俱係情罪重大之人不便停決秋後處決人犯去歲朝審秋審暫停一年係奉特旨軍流人犯雖係輕罪應否減等洪恩出自 皇上將大學士等所奏之處毋庸議得旨今年秋審著停止情有可矜疑人犯著照常審理具奏見審人犯內罪不至死者亦著減等發落○辛巳刑部議覆江蘇巡撫張伯行奏江南鄉試副考官趙晉自縊身死一案審無受賄情弊但不嚴行看守令重犯得以縊死應將揚州府知府趙宏煜等分別議處具奏得旨各官自當議罪趙晉果否身死之處著交巡撫張伯行徹底查明具奏○乙酉 上還京師○諭大學士掌院學士等近見翰林等官告假者甚多三分中已去其二又庶吉士等正當學習時遽回本籍至三年考試將近又來考試似此任意告假焉得學習此後除丁憂終養外凡翰林庶吉士

告假者應照致仕知縣例不准補用又見在教習進士內有告假者亦應照此例行再科道官員職任甚重亦有任意告假回籍者爾等會同九卿一併議奏尋議翰林院修撰編修檢討庶吉士教習進士並科道官員有告病回籍者悉令休致從之○兵部議覆四川陝西總督鄂海奏洮岷邊外大山內居住生番傾心歸順著洮州土司楊如松管轄應如所請又請給楊如松印信應不准行得旨楊如松管轄土司甚多新投順番人又令伊兼管非給予印信何以管轄著俱照該督所請行○丙申以旱命禮部祈雨詔廷臣言事○庚子予故原任兵部尚書范承勳祭葬

三月乙巳賑甘肅所屬災給牛種流移者所在送還○癸丑差往甘肅工部右侍郎常泰大理寺少卿陳汝咸請訓 上諭朕曾至甯夏其地方有似蒙古所種惟有青稞遇歲不收民卽流散爾等

到彼應與總督鄂海巡撫樂拜計議教百姓牧養牛羊蓋甘肅地方不比直隸山東與蒙古同宜畜牛羊雖遇荒歲食乳亦可度日又地產肉苁蓉天門冬煮食之味似山藥又一種沙米亦可食被災諸處爾等親身往勘會同督撫酌議以聞○丁巳原任戶部尚書王鴻緒進所撰明史列傳二百八十卷命交明史館

夏四月癸酉諭吏部教官有教養士子之責員缺甚屬緊要嗣後掣選教官者應取至京師令大臣面試方可補授補授州同人內不堪者甚多亦應取至京師令九卿面試補用出身有不明者著革退○諭和碩親王允祉等古厯規模甚好但其數目歲久不合今修厯書宜依古之規模用今之數目爲善○乙亥諭禮部朕惟治天下以人心風俗爲本欲正人心厚風俗必崇尙經學而嚴絕非聖之書此不易之理也近見坊間多賣小說淫辭荒唐俚鄙殊

非正理不但誘惑愚民卽縉紳士子未免遊目而蠱心焉所關於風俗者非細應卽通行嚴禁其書作何銷毀市賣者作何問罪著九卿詹事科道會議具奏尋議凡坊肆市賣一應小說淫辭在內交與八旗都統都察院順天府在外交與督撫轉行所屬文武官弁嚴查禁絕將板與書一併盡行銷毀如仍行造作刻印者係官革職軍民杖一百流三千里市賣者杖一百徒三年該管官不行查出者初次罰俸六箇月二次罰俸一年三次降一級調用從之○戶部左侍郎塔進泰以老病乞休允之○丁亥諭大學士等昔人有言正朝廷以正百官正百官以正萬民舉賢退不肖正百官也二者不可偏廢如但舉賢而不退不肖則賢者知所勉而不肖者不知所懲終非勸眾之道惟黜退不肖之員則眾人方知所戒俱勉爲好官矣○庚寅刑部奏原任江南江西總督噶禮之母叩

閤內稱我親生子噶禮令廚下人下毒藥欲將我藥死此等兇惡
皆係我少子色爾奇與噶禮之子干都合謀而行又噶禮以昌泰
之子干太認爲己子令妻私自撫養我丈夫普善在日將噶禮之
妻並干太逐出昌泰聚集親戚拆毀我房屋幾至毆打又噶禮家
巨富將妻子及親密人等俱住河西務不知何意噶禮奸詐兇惡
已極請正典刑等語審據噶禮及噶禮之弟色爾奇子干都並首
服噶禮身爲大臣任意貪婪又謀殺親母不忠不孝已極應凌遲
處死妻論絞弟色爾奇子干都立斬昌泰之子干太發黑龍江當
苦差家產並入官得旨噶禮著自盡其妻亦令從死色爾奇干都
俱改應斬監候秋後處決餘依議○辛卯 上奉 皇太后避暑
塞外啟鑒○壬辰宗人府奏輔國公賴士不安靜守分令伊太監
李壽串同內太監在各處探聽信息布散流言行事甚屬不端應

將賴士公爵革退監禁撤去所屬佐領人員得旨賴士著革退監禁其公爵與應襲之人承襲所撤屬下佐領人員給與承襲公爵之人○己亥禮部等衙門議准署理偏沅巡撫布政使阿琳奏辰州府屬乾州鎮溪所雖處邊隅近蒙皇上德教覃敷苗人向化比年以來民知向學請設立學校建於乾州自康熙五十四年爲始歲科取文武生員各八名以瀘溪縣訓導就近兼攝從之

五月辛丑朔

上駐蹕熱河○己酉以敦稗爲內閣學士

由內閣侍讀學

遷○辛酉予故左副都御史阿爾筏祭○甲子江蘇巡撫張伯行奏參布政使牟欽元將上海縣奸棍張元隆之兄張令濤潛匿署中似此豪棍抗官布政使不行緝解反爲容納誠恐有誤地方不得不據實糾參得旨牟欽元著暫革職該督察審具奏

六月乙亥諭領侍衛內大臣等朕想拉藏汗一子前往策妄阿喇

布坦處娶親一子在青海地方駐紮在策妄阿喇布坦處娶親之子策妄阿喇布坦若託辭愛婿留住數年不令之歸再如駐紮青海之子朕復憐愛留住伊處總無人矣豈不孤危況拉藏汗年近六十自當爲其身計伊之人少土伯特人甚多而又秉性兇惡可保常無事乎拉藏汗將兇惡第巴殺死朕加褒獎封爲扶教恭順汗伊眞傾心內嚮不但朕知之卽彼處人亦皆知之但厄魯特秉性猜疑又甚疏忽儻或事出不測朕雖憐伊伊雖倚朕此閒地方甚遠相隔萬里救之不及事後徒貽悔耳卽朕亦無法也朕此想甚屬遠大伊亦係曉事之人若不深謀防範斷乎不可朕爲拉藏汗時常留意也○丙子先是原任戶部尙書希福納叩闕告伊家人長命兒等夥同惡棍桑格等訛詐伊家財物又強勒放出家人等款上命領侍衛內大臣侯巴渾德同內務府總管查奏尋奏

希福納告誡親王允祉屬下人明圖屠巴海貝子允禔屬下人常有太監李進忠敦郡王允祜屬下太監鄧珍楊茂生貝子允禔屬下人雅代達爾布七十鄂羅皇十五子允禩屬下太監陶國泰王國柱皇十六子允祿屬下太監曹貴德陶進孝衣裳庫太監蘇國用等訛詐之處並無證據應無庸議其家人長命兒等因希福納居官貪婪希圖訛詐是實應交刑部審理再希福納叩關後伊家人虎兒首告希福納侵盜庫銀應將希福納並虎兒交刑部審理得旨依議案內太監等指稱小阿哥妄行甚屬可惡不可不嚴加審訊爾等仍會同刑部嚴行審理具奏至是奏長命兒等夥同桑格等訛詐希福納得銀一千餘兩應將長命兒對秦二小子愷七禮俱照惡棍爲首例擬斬立決桑格存住趙六照爲從例擬絞監候秋後處決太監李進忠等逐一夾訊雖訛詐皆虛而身爲太監

干涉外事往來希福納之家殊屬兇惡亦應照爲從例擬絞監候
秋後處決其明圖等與希福納質對並無訛詐實迹俱無庸議虎
兒首告希福納侵盜庫銀一案查審情實應將希福納擬斬監候
秋後處決其侵盜庫銀九萬七千兩應照數追取入官至希福納
擅將庫銀私自入己前任戶部郎中今山西布政使查林布等隱
匿不首俱應革職得旨希福納著從寬免死長命兒對秦二小子
愷七禮俱著改爲秋後處斬桑格存住趙六李進忠鄧珍楊茂生
王國柱陶國泰曹貴德陶進孝蘇國用俱著擬絞監候秋後處決
查林布等俱著革職餘依議○諭大學士等太監等不可假以威
權事發卽殺之朕御極之年去明代不過二十年萬厯時太監以
及官員朕俱曾任使伊等向朕奏明末時事謂流賊自南而來將
兵盡發往保定後流賊從居庸關入跳越京師南關攻城城內無

兵止太監百姓官員家人防守七日城卽陷平日太監等專權人主不出聽政六臣官員俱畏懼太監以致誤事此輩性情與常人異止足備宮中使令耳天下大權惟一人操之不可旁落豈容假之此輩乎又萬厯年間太監奏庫內積銀二百萬兩有餘應入大內遂盡收養心殿後掘窖埋藏後欲取用已無有矣所以我朝者舊常言明代蓄積徒資太監侵盜耳今我朝庫銀有數千萬兩若收進埋藏亦安所用朕常謂漢大臣云明代以爭議河套事曾殺大臣一小事何至殺戮大臣若當此時朕止須遣一筆帖式一撥什庫事卽定矣漢大臣皆相顧驚愕朕幸甯夏過鄂爾多斯地方謂松阿喇布王云爾等祖宗不過欺侮漢人遂據河套耳若朕則自橫城坐船帶糧從鄂爾多斯之後鈔出據守爾等將若之何松阿喇布王瞿然奏云今內外一家皇上奈何出此可畏之言回鑾

時朕由橫城坐船計二十一日至湖灘河朔已將馬匹發往陸路
此二十一日率兵步行圍獵打魚而回又諭曰朕自幼讀書聽政
已久治國之道莫要於寬舒今天下承平無事凡屬老幼無不歡
欣鼓舞以爲得生斯世皆有福之人也又諭曰條奏官員每以墾
田積穀爲言伊等俱不識時務今人民蕃庶食畧田寡山地盡行
耕種此外更有何應墾之田爲積穀之計耶○己卯以綽奇爲甘
肅巡撫由戶部右侍郎遷○壬午始樵呼努呼河木稅○江蘇巡撫張伯
行奏臣查江南鄉試副考官趙晉進監後揚州府知府趙宏煜一
任典史金鎬縱容及報趙晉自縊又草率取供不親自相驗委高
郵州知州李之檀驗報屍圖與趙晉狀貌不符眾供互異據此趙
宏煜故行疏縱情弊顯然江都縣知縣王銑等旣已疏玩於先復
不能確查於後不惟趙晉生死難明並在監與否亦不敢定請將

揚州府知府趙宏煜等革職一併嚴審得旨趙宏煜李之檀王銑等俱著革職該撫嚴審定擬具奏○癸未以炎暑免從臣晚朝○諭刑部寬恤獄囚○丙戌諭領侍衛內大臣等天氣甚熱貿易人等多夜行者伊等但知爲利不顧其身朕甚念之嗣後有緊要事方許夜行朕視商民皆如赤子無論事之鉅細俱當代爲熟籌也至於一應隨行官員兵丁執事人等如有公事不必過亟緩緩前行將此交與兵部自喀喇和屯以至口上俱徧張告示並於各該管處通行曉諭○辛卯以呂猶龍爲湖北布政使

由浙江按察使遷

李世

仁爲江蘇布政使

由貴州按察使遷

東華錄

康熙九十四

臣王先謙敬編

臣周潤蕃恭校

秋七月辛亥諭大學士九卿等朕聽政年久深悉民生利弊頃聞江南暵旱江浙米價亦昂山東河南田麥歉收交冬米必騰貴彼時卽急料理亦不能及朕詳細思維可截漕糧三十萬石分貯江甯蘇州淮安揚州杭州開封諸府以備平糶○戊午刑部議覆江蘇巡撫張伯行奏秋審大典臣應與督臣赴常州府會審但臣所屬地方近海蘇松一帶五方雜處最易藏奸前有上海奸民張元隆通賄肆行經臣特疏奏聞近又有奸民張令濤潛匿江蘇布政使牟欽元署內屢提不出臣恐蘇州地方不無可慮請俟新任提督穆廷枻到松後臣再往常州與督臣會審應不准行得旨張伯

行居官清潔素所聞知清則眾心無有不服縱有一二匪類小人國法具在蘇州府有何可慮張伯行疑惑恐懼殊爲過甚這所奏不准行著仍照舊例速赴常州府會審○己未諭大學士等朕理事年久洞悉錢法錢價隨時不同銅價貴卽毀小錢作銅賣銅價賤卽盜鑄小錢用小錢則私鑄之人有利用大錢則私鑄之人無利然小錢又不可禁今大小錢兼用於民甚便錢法流行莫如我朝南至雲南貴州北至蒙古皆用制錢從古所未有也治天下當寬裕仁慈以因人性不可拂逆卽如滿洲蒙古各方之人飲食日用其性各殊必欲一之亦斷不可行也問學士關保曰爾曾居蒙古一年用漢人之道可治蒙古否關保奏曰不可上曰拂人之性使之更改斷乎不可譬如陝西江南百姓令其易地而居則不但彼處田土此不能耕此處器械彼不能用卽水土亦多不服惟

天賦忠孝之性無有異同卽窮荒僻壤亦有至忠至孝之人不可

以地論也○辛酉以甘國璧爲山東布政使由浙江按察使遷楊宗仁爲

浙江按察使由陝西西甯道遷○丙寅諭大學士等拉藏汗奏請打箭鑪

地方朕思打箭鑪原係本朝地方我朝之人實處其地於拉藏汗

大有裨益我朝之人若行撤回則茶市亦停大無益於伊等如必

要此地著伊親來與我諸王大臣等會議如此議行則伊斷不來

矣○是月免河南鄭州祥符等二十六州縣旱災額賦有差

八月庚午朔以祖業宏爲江蘇按察使由浙江金衢嚴道遷○癸酉予故甘

肅巡撫樂拜祭葬○乙亥上行圍發熱河○己卯移甘肅慶陽

府捕盜同知駐靖遠衛與衛守備協同理事其慶陽捕務歸知府

兼管○辛巳都察院奏兩淮鹽差將原任管理江甯織造事通政

使曹寅之子曹容職名開列具奏得旨兩淮鹽課先欠一百八十

餘萬兩自將李陳常補授運使所欠銀兩俱已清完李陳常實能效
力鹽務將伊授爲御史巡視兩淮鹽課一年李陳常原係九卿
保舉之員此運使員缺著九卿必如李陳常之人揀選保舉具奏
○是月免浙江建德嚴州等五縣所水災額賦有差

九月庚戌戶部議覆湖廣總督額倫特奏臣奉命同戶部郎中瓦
渾泰查勘湖南荒田一案實在各州縣荒蕪田地四萬六千一百
頃有奇各屬士民無不踊躍爭先願爲開墾懇於六年後仍照下
則升科從之○壬子 上還熱河○乙卯賜來朝外藩銀幣鞍馬
及隨圍蒙古官兵銀布○戊午 上奉 皇太后自熱河回鑾○
乙丑罷臨清關監督命巡撫兼理之○丙寅 上奉 皇太后還
京師○是月免浙江山陰江南蒙城等六縣被災額賦有差
冬十月己巳朔諭和碩誠親王允祉等北極高度黃赤距度於厓

法最爲緊要著於澹甯居後每日測量尋奏測得暢春園北極高三十九度五十九分三十秒比京城觀象臺高四分三十秒黃赤距度比京城高二十三度二十九分三十秒報聞○刑部議覆江南江西總督赫壽奏江蘇巡撫張伯行參布政使牟欽元藏匿海賊黨羽張令濤一案查上海縣民顧協一因贖房控告張令濤與賊合夥及審問顧協一並無證據又按查牟欽元署內亦並無張令濤訊張令濤子張二稱伊父往湖廣福建應行文兩省巡撫拏解送審得旨著尙書張鵬翮左副都御史阿錫鼐前往審明具奏○庚午以白潢爲貴州按察使由糧驛道遷○癸酉內閣學士管寶以老病乞休允之○乙亥諭九卿九卿內各省人俱有凡翰林院中會差正副主考及房考者其聲名賢否必皆知之著從公舉出優者升用劣者革退九卿於本省出差人員不必與議蓋伊等子弟

試而中卽以爲好試而不中卽以爲不好殊不可爲據也若不存私意賢否皆從公舉出則科場可得清理矣卽如月選官員悉令九卿驗看凡出身不明行止不端者俱知畏懼不敢謁選此甚有益○丁亥諭刑部朕聽政多年勤求民瘼刑獄之事尤所畱心詳閱直隸各省題奏命盜各案自審結以至具奏或踰時或經歲部議又閒有覆駁再令詳審者案內牽連之人雖笞杖輕罪不免羈禁以俟完結淹厯歲時離家失業至於飢寒病斃者往往有之朕軫懷民命深用憫惻嗣後直省刑名除重犯案內軍流徒罪仍應候旨完結外所有杖罪以下輕罪著各該督撫於審結日卽行發落不必羈候爾部於奏內逐一聲明務使無知註誤之民早得脫身甯家以副朕哀矜體恤至意其不關奏請各該督撫應自行審結發落者仍著照依舊例○予故原任四川陝西總督殷泰祭葬

諡清端○戊子刑部議准江蘇巡撫張伯行奏奸商張元隆廣置

洋船海上行走審據夥黨吳良佐供係原任將軍馬三奇家人請
飭部將馬三奇並船戶發至江南質審得旨著張鵬翮等詳審具
奏張伯行與馬三奇不合乘機奏請發審馬三奇之父陣亡伊身
又係大臣不必發往江南聽審著兵部取供咨送○己丑諭南書

房翰林等向來升殿所奏中和樂章皆仍明代所撰句有短長體

製不類嗣後因文體不雅命大學士陳廷敬等改撰其章法皆以

四字爲句而奏樂人未易聲調仍以長短句法湊合歌之是雖文

法易而聲調未易也今考查舊調已得其宮商節奏甚爲和平必

得歌章字句亦隨詞調則章法明而宮調諧此事所關甚要著南

書房翰林同大學士等詳考定議務使章法與聲調協和歸於允

當○以噶什圖爲山西布政使由御史遷○壬辰諭大學士等朕自幼

讀書無一時不以民間疾苦爲念巡撫乃專任封疆之大吏理應實心爲民勤求樂利邇來浙省地方歉收民生艱難每觀巡撫王度昭所奏並無盡心利民之處再河南巡撫鹿祐所奏事宜亦未得當爾等傳問九卿○工部侍郎舒蘭緣事降調○丁酉大學士等奏臣等以王度昭鹿祐問九卿僉云王度昭前居官亦有才能今不盡心爲民全無益於地方鹿祐向來居官謹慎此數年來精力衰邁處事不當誠如 聖諭報聞○免盛京旗人六年稅糧及逋欠○是月免甘肅靖甯等八州縣衛旱災額賦有

十一月戊申命賑甯夏災民其流移者所在發廩賑之○庚戌諭戶部甘肅靖邊衛等處年歲不登民艱粒食已多方賑濟本年錢糧或蠲或停而山地磽瘠民鮮蓋藏若不大沛恩施目前已自艱難來歲更何倚恃此二十八州縣衛所明年額徵銀糧芻蕘悉予

蠲免○辛亥分遣修理厯法何國棟等於廣東雲南四川陝西河南江西浙江測量北極高度及日景○乙卯諭戶部賑荒以速爲貴必待奏報候命使小民嗷嗷待哺何如豫備於平時則所在有可恃之資糧而臨事免轉移之勞費今漕輓通行大倉充裕江浙頗有歉收郡縣已令留漕米二十三萬但恐米尙不敷可再留江甯蘇州安慶杭州漕糧三十餘萬石分貯各屬備賑○和碩誠親王允祉等以 御製律呂正義進呈得旨律呂厯法算法三書著共爲一部名曰律厯淵源○丙辰 上巡幸塞外啟鑾○命纂修玉牒○辛酉裁山東兗道所屬州縣事務統歸兗州東昌兩府管理○甲子 上駐蹕東莊諭諸皇子允禩因伊母二周年往祭事畢理應趨赴行在乃允禩於朕駐蹕遙亭之次日以將斃鷹二架遣太監一名親隨人一名來請朕安言伊在湯泉等候回京

並不請旨藐視朕躬朕因憤怒心悸幾危允禩係辛者庫賤婦所生自幼陰險聽相面人張明德之言遂大背臣道覓人謀殺二阿哥舉國皆知伊殺害二阿哥未必念及朕躬也朕前患病諸大臣保奏入阿哥朕甚無奈將不可冊立之允禔放出數載之內極其鬱悶允禩仍望遂其初念與亂臣賊子等結成黨羽密行奸險謂朕年已老邁歲月無多及至不諱伊曾爲人所保誰敢爭執遂自謂可保無虞矣朕深知其不孝不義情形卽將所遣太監馮進朝等於朕所御帷幄前令眾環視逐一夾訊伊已將黨羽鄂倫岱阿靈阿盡皆供出自此朕與允禩父子之恩絕矣朕恐後日必有行同狗彘之阿哥仰賴其恩爲之興兵構難偏朕遜位而立允禩者若果如此朕惟有含笑而歿已耳朕深爲憤怒特諭爾等眾阿哥俱當念朕慈恩遵朕之旨始合子臣之理不然朕日後臨終時必

有將朕身置乾清宮內爾等執刃爭奪之事也允禩因不得立爲
皇太子恨朕切骨伊之黨羽亦皆如此二阿哥悖逆屢失人心允
禩則屢結人心此人之險百倍於二阿哥也○乙丑 上駐蹕老
牛河覽允禩奏摺諭諸皇子曰朕前命將雅齊布夫妻充發乃敢
違旨潛匿在京朕已差官將雅齊布等正法此事與二阿哥釋放
應正法之得麟相似豈非藐視朕躬而爲此舉乎伊摺內奏稱冤
抑試問伊所謂冤抑者何在總之此人黨羽甚惡陰險已極卽朕
亦畏之將來必爲雅齊布等報讎也○吏部議准四川陝西總督
鄂海奏山西蒲州陝西朝邑疆界相連百姓每爭地相關且朝邑
縣治在河以西所屬王家莊等處及大慶關皆在河東與山西接
界請將同州州同移駐大慶關撥潼關千總一員移駐王家莊以
資防禦從之○丙寅 上駐蹕兩家寨諭諸皇子允禩甚是狂妄

竟不自揣伊爲何等人於復廢二阿哥之時來朕前密奏云我今如何行走情願臥病不起朕云爾不過一貝勒何得奏此越分之語以此試朕乎伊以貝勒存此越分之想探試朕躬妄行陳奏豈非大奸大邪乎○是月免浙江錢塘衢州等十四縣所旱災額賦有差

十二月己巳朔雲南巡撫吳存禮丁母憂命回旗守制○癸酉

上駐蹕特布克賜喀喇沁隨圍蒙古官兵銀幣○甲戌先是吏部

以大學士溫達員缺開列尙書富甯安等請旨本畱中至是諭吏

部曰溫達補授大學士以來寬厚簡靜今雖年老告退尙自康健

著仍在大學士任辦事○轉常泰爲工部左侍郎以滿丕爲工部

右侍郎

出廣東巡撫遷

以傅爾笏納爲戶部右侍郎查克旦爲內閣學士

由內閣侍讀學士遷

○乙亥以王度昭爲工部右侍郎

由浙江巡撫遷

施世綸爲雲

南巡撫

由倉場侍郎遷

○辛巳

上駐蹕熱河

○以達禮虎爲內閣學士

由光祿寺卿遷

○癸未以呂履恒爲倉場侍郎

由左副都御史遷

徐元夢爲浙江

巡撫

由內閣學士遷

○乙酉鹿祐以病乞休允之調李錫爲河南巡撫

由偏

沅

調○戊子先是商人馬維屏等以願領大錢收買小錢叩閭上

命內務府同戶部會議戶部尙書趙申喬以其事不可行而郎中

羅復晉將准行議稿送侍郎王原祁廖騰焄畫題具奏不曾送伊

畫題奏請罷斥至是迎

駕

上命近前問爾欲告退何意趙申

喬奏曰司官藐視無顏居職

上曰凡事有理不可尙氣君子懲

忿窒慾此語最宜詳思此一小事司官藐視卽當參拏何必忿怒

且寬則得眾爾性苛急不能容人向任巡撫時所參官員有身自

知之而參者亦有因人言而參者果皆實耶天地之大德曰生所

謂好生者非但不殺而已蓋於萬物皆養育而保全之之謂也爾

居官雖清豈可自恃其清而爲矯激之行乎隨將原奏批發趙申喬身係大臣非微員可比此事若斷不可行理應具疏陳奏乃爲無可控告之狀輒欲乞休殊屬不合著速入部辦事○諭大學士等布政使牟欽元居官好前巡撫張伯行奏參牟欽元交通海賊此皆伊多疑所致朕曾遣張鵬翮往審尋張鵬翮摺奏時朕批令張鵬翮同張伯行領兵於有海賊之處親行往拏總督赫壽聞此消息坐小船往黃天蕩探察方知張伯行所言皆虛妄耳張伯行又奏噶禮下人甚眾恐欲殺伊爲噶禮報讎此亦無影響之事特因向牟欽元索幕賓不得遂起釁端總督巡撫皆有幕賓若爲此生疑尋隙亦非爲大臣之體清官多刻刻則下屬難堪清而寬方爲盡善朱子云居官人清而不自以爲清始爲真清又如易云不家食爲官之人凡所用之物若皆取諸其家其何以濟故朕於大

臣官員每多包容之處不察察於細故也人當作秀才時負笈徒步及登仕版從者數人乘馬肩輿而行豈得一一問其所從來耶

○諭直隸各省州縣官或革職或被參解任或身故者妻子尙能回籍其縣丞主簿典史驛丞等微員革職解任身故者無力回籍羈畱異鄉不免凍餒甚至有死亡者即使犯罪至死亦與妻子無涉甚屬可憫且如各地方鰥寡孤獨不能度日尙設立養濟院以育養之此等微員理應撫恤嗣後將伊等作何令回原籍爾等與九卿會議以聞尋大學士等議行文直隸各省如有縣丞等微員革職解任身故無力回籍者該督撫設法令回籍毋致失所從之

○以董宏毅爲左副都御史

由宗人府府丞遷

勒什布爲內閣學士

由內閣侍

讀學士遷

○己丑

上還京師○庚寅浙江巡撫徐元夢雲南巡撫施

世綸陞辭

上諭徐元夢曰浙江有滿洲將軍駐紮凡滿洲兵爾

當與將軍協同訓練浙江錢糧虧空不多卽畧有之爾宜清理毋累百姓至於用人宜隨材器使不可求全謹遵朕諭無忽諭施世綸曰爾居官聲名甚好但過於偏執不度事理惟以己所知者爲是天下凡事當中道而行今爲封疆大臣理宜盡改前非不可拘執己性雲南年來米價騰貴地方甚遠儻遇災荒難於賑救爾宜留心料理至馭下屬務以寬恕爲本○諭大學士等部院衙門不曉事人甚多若不革退則有才能之人安得升轉學士沈涵人甚不及著革退○辛卯兵部議准四川陝西總督鄂海奏洮岷所屬邊外生番喇子等一十九族頭目扎世咱等歸誠番地周圍約千餘里計一千二百九十二戶男婦大小共八千四十六口請令土司楊如松管轄從之○壬辰諭大學士等戶部尙書趙申喬保舉潮州知府張應詔爲郎中時寓居寺院能耐貧苦授知府不製衣

服隨從數人果如此言殊爲未當爲官者並不繫於貧富張伯行家道甚饒任所日用之物皆取諸其家足迹所至防人謀害隨從四五十人今以爲不清可乎且巡撫管理軍務一應兵丁宜鼓舞作興常加恩恤今以己爲清官獨市餅餌而食兵丁賞賚不及豈合於理凡事皆有道理爲官之人不取非義之財一心爲國效力卽爲好官或操守雖清不能辦事無論諭旨批駁與部駁之事積年累月概不完結似此清官亦何裨於國事乎○以楊琳爲廣東巡撫

由福建陸路提督遷

陳璜爲偏沅巡撫

由福建寧遠道遷

○是月免江南上元

等五十一州縣衛所湖廣沔陽等十三州縣衛浙江山陰等三縣

被災額賦有差○是歲朝鮮來貢○人丁戶口二千四百六十二

萬二千五百二十四又永不加賦滋生人丁十一萬九千二十二

田地山蕩畦地六百九十五萬七百六十四頃九十畝有奇徵銀

二千九百八十九萬三千二百六十二兩五錢有奇米豆麥六百八十三萬一千六百六石有奇草四百四萬六千二百七十四束茶三十四萬一千四百二十四引行鹽五百九萬九千八百五引徵課銀三百七十四萬一千一百二十四兩有奇鑄錢三萬八千六百五十五萬九千九百有奇

東華錄

臣王先謙

臣周澗蕃恭校

康熙五十四年乙未春正月甲子諭大學士九卿等科場出題關係緊要鄉會經書題目不拘忌諱斷不可出熟習常擬之題朕常講易及修定天文律呂算法人人皆知必以此等書擬題爾等皆係應點考試之官雖未派定何人然斷不可以此諸書出題表題亦不可出修書賜書等類不然則人皆以擬題倖進實學何由而得張鵬翮爲主考所出經書策論題皆主理學意義相同彼雖無情弊而所取之人甚多僥倖人殊怨之趙申喬所取解元係請人代作畏罪逃竄以致人皆不服趙申喬亦無言可以自解然彼不過觀其文章耳其中情弊何由得知故知出題乃大有關係之事

再房官亦屬緊要若房官有弊主考無如之何今可將一房卷令不同省房官二人同閱如一人有情弊發覺後二人並坐則各知畏懼互相糾察矣部院司官凡進士舉人出身者皆例應分房之人若學問不堪不識文字何以衡文取士伊等宜加考試再五經中式甚屬無益十七八歲之幼穉皆能之不過手敏多寫字耳殊無實學著停止○諭朕前日考試翰林院竟有不能詩文之人詩中有用習坎等字者此因朕素講易經故皆濫用不計切題與否彼皆以荒疏已久爲辭部院司官有辦理之事猶可云荒疏翰林理應讀書亦可云荒疏乎今之翰林迥不如昔昔如熊賜履張玉書張英陳廷敬徐乾學徐元文徐秉義王士正等學問俱佳又如內廷行走及武英殿修書翰林亦較在外翰林不同詩文皆大方總由每日纂修校對之故也○封阿霸垓台吉德木楚克爲達爾

漢輔國公以隨征三次嚮導效力故也○丙寅諭宗人府員勒允
祺延壽行止卑污凡應行走處俱懶惰不赴著將伊等俸銀俸米
及伊屬下護衛官員俸銀俸米俱著停止

二月戊辰朔奉差江南審事吏部尚書張鵬翮等奏參江蘇巡撫
張伯行捏造無影之事屢以海中有賊誑奏請將張伯行暫行革
職審理得旨張伯行著暫行革職審理伊奏內有不欺君並張元
隆夥賊甚多將蘇州等糧買去等語巡撫係地方大吏管轄文武
官員且有調兵責任若海中有賊卽應率領官兵親身察拏况盛
京山東浙江閩粵等處沿海地方設立將軍督撫提鎮水師官兵
原爲防海張元隆等銀兩雖多沿海一帶官兵豈能盡行賄賂鄭
盡心陳尙義等本係海賊頭目朕久已招撫拏獲今張伯行將伊
等枝梧搪塞希圖完事與伊不欺君之語殊爲乖謬張伯行必深

知賊巢務將此賊察拏審明具奏○己巳諭大學士等總漕所管皆窮苦運丁事最冗雜卽廷極爲總漕盡心撫恤人皆感悅年年漕船抵通獨早糧米並無虧欠回空船隻亦不致凍阻由其實心辦事區處得宜也昔桑額任內尙因糧船遲誤不免議處以前總漕未有能及卽廷極者昨聞病故甚爲軫恤漕運總督職任重大可著雲南巡撫施世綸升補但其氣性有偏僻處朕前已誠諭之矣○廣西提督張朝午奏參新太營參將王啟雲擅自領兵與猺人交戰殊屬輕躁請敕部議處 上諭大學士等朕觀王啟雲不惟無過且似有功猺人劫掠村莊圍繞州署知州曉諭不解參將有防守地方之責若惟啓釁是懼設執縛有司劫奪倉庫亦坐視不救可乎猺性凶頑豈得任其恣行昔年陝西番人擅過邊界領兵官理諭不聽遂領標兵五百人深入番地剿之部議照例處分

朕從寬降級畱任今王啟雲情事略同議處亦止降級罰俸而已
尋兵部議覆王啟雲因搖賊猖狂始行勦殺非輕躁動兵之例可
比且續經奏明傷亡應無庸議從之○以甘國璧爲雲南巡撫由山東布政使遷○癸酉上巡幸畿甸啟鑒○以王之樞爲內閣學士原任

○庚辰諭直隸巡撫趙宏燮朕嘗讀無逸畱心稼穡久矣去歲臘
前瑞雪盈尺時屆陽節細雨連綿輿情怡悅早得布種矣所慮者
起發太盛則收穫之際恐有二疸之虞爾等徧示民間芸鋤時令
苗稍疏豫防風霾朕以民生爲念勸農爲本己有所知不得不示
特諭○諭直隸巡撫趙宏燮朕每年春間行幸水淀近見民生雖
不能家給人足比之往時似覺差勝但村莊之中誦讀尙少朕思
移風易俗莫過讀書况畿輔之地乃王化所先宜於窮鄉僻野皆
立義學延師教讀以勉勵孝弟可望成人矣爾卽徧示村莊俾皆

知朕崇文好學之深意○辛卯 上至河西務閱隄○乙未 上還京師○是月免江南江浦縣上年旱災額賦有差

三月己亥先是 上以蒙古地方大雪命理藩院遣官閱勘牲畜倒斃缺食窮困人等至是回奏得旨散賑之事勢難速達吳喇忒等旗居近黃河蒿齊忒阿霸垓阿霸哈蘇尼特等旗有達爾諾爾郭果蘇泰察漢諾爾諸水可先教其捕魚爲食每處派新滿洲三十人並造船人等遣理藩院司官帶網前去教導蒙古人等其作何運給米糧及給與牲畜養贍之處理藩院速議具奏○庚子諭吏部趙宏燮簡任直隸巡撫已屆十年勤勞供職旗民輯睦京畿重地趙宏燮著加總督職銜仍管理巡撫事務○以李成龍爲山東布政使由直隸巡道遷○辛亥奉差江南審事尙書張鵬翮等奏張伯行見任巡撫不肯實供其屬員又不敢質證請將張伯行革職審

究得旨張鵬翮等係特遣審理此案大臣欽交事件應盡心審明
委員具奏海中如果有盜賊張鵬翮等應同張伯行親往賊巢查
拏審明若海中無賊張伯行前奏不欺君之語乖謬顯然如此則
事之是否自明其有應行請旨之處宜具奏候旨審理乃屢次前
往未能徹底審明希圖苟且完事蒙混結案今又請將張伯行革
職嚴審殊玷官箴此事仍著張鵬翮阿錫鼐前往徹底審明具奏
○壬子命戶部尙書穆和倫運米賑吳喇忒等十四旗及察哈爾
八旗○癸亥諭大學士等自古帝王敬天勤政凡遇垂象必實修
人事以答天戒今歲四月朔日蝕望又月蝕凡關繫國計民生或
有應改應行之處爾等會同九卿詳議以聞尋議覆見在政事實
無可更改之處 上諭朕有所見數事特諭爾等天下承平久矣
自昔太平日久必生事端今內而各部院大臣外而各省督撫提

鎮漸耽逸豫於事稍涉疏忽夫治益求治安益求安制治於未亂保邦於未危朕之素志也爾等宜皆體朕慎終如始之意共勸久安長治之業至於一切頌揚之文俱屬無益朕見近來頌聖之語殊多悉應停止凡事皆宜務實何必崇尚虛文卽如爾等師生之間一發議論卽互相推贊書札來往亦大都獎譽過情此甚無謂也又如注書一事所繫匪輕必深識古人之意得其精要乃可注解若學力未到妄自注輯則意義反晦矣朱子所著諸書其義甚明迄今五百餘年人無訾議朕每見近今人所注書細探其旨大約皆私意爲人如張伯行所作有一部書全爲湯斌一人其他書亦有爲明時數人者皆伊同鄉人也至於近思錄乃朱子之書義甚明晰何必更注且朱子亦言其中尙有數處未妥可見著書誠非易事朕所諭數者俱於世道人心大有關係爾等宜皆誠之○

乙丑諭領侍衛內大臣等朕常講論天文地理及算法聲律之學爾等聞之輒奏曰皇上由天授非人力可及如此稱譽朕躬轉掩卻朕之虛心勤學處矣爾等試思雖古聖人豈有生來卽無所不能者凡事俱由學習而成務學必以敬慎爲本朕之學業皆從敬慎中得來何得謂天授非人力也

夏四月丙寅朔日有食之○戊辰內閣學士達禮虎以年老乞休允之○庚午賜徐陶璋等一百九十人進士及第出身有差○甲戌內閣學士鄂齊珥以病乞休允之○乙亥先是太常寺奏請將新定樂律載入訓典得旨此樂本明朝所作審定原好但因年久樂律舛錯聲音略有不同朕爲正之並非出剗造今此告成之事不可全歸於朕大學士同九卿等會議具奏至是禮部等衙門奏覆樂器相沿歲久制度漸差音律多舛皇上深究元音釐定損

益制度悉協音韻合宜恭請

欽定樂章擬定樂名並將起造告

成年月制度一併注明載入典訓昭垂萬世報聞○戊寅以星峨

泰長壽俱爲內閣學士

星峨泰由內閣侍讀學士長
泰由翰林院侍講學士遷

○己卯甘肅

提督師懿德奏四月初二日哈密扎薩克達爾漢白克額敏咨言
厄魯特策妄阿喇布坦遣兵至北境侵掠五寨初三日又咨言賊
兵於三月二十五日抵哈密城下臣檄肅州總兵官路振聲領兵
先赴哈密臣俟出廠馬調到卽親身往救得旨策妄阿喇布坦遣
兵侵掠哈密肅州總兵官已領兵往救應再發西安滿洲兵三千
總督標下營兵二千甘肅提督標下兵亦酌量派出星急前去救
應再行文青海左翼及喀爾喀扎薩克等各令防備著議政大臣
會同理藩院大臣速議具奏尋議覆西安滿洲兵令將軍席柱與
副都統一員帶領總督標下兵令副將一員帶領甘肅提督亦令

帶領標下兵俱於文到三日內啟行兵馬錢糧令西安巡撫永泰沿途料理此三處兵應派大臣一員前往調遣選厄魯特巴爾虎大臣侍衛官員等帶至軍前以備偵探賊蹤之用西甯嘉峪關兩路各設驛站派筆帖式坐臺西甯青海等處事務令侍衛阿齊圖等暫駐西甯料理青海左翼與哈密相近貝子阿拉布朱兒與噶斯路相近西甯及四川松潘俱與青海相近皆應行文各令整備見今甘肅兵丁俱調出口應調涼州兵一半至甘肅要路防守再策妄阿喇布坦見侵哈密未必不至喀爾喀地方應派大臣一員前往傳諭喀爾喀並厄魯特王策零旺布公多爾濟色卜騰茅海輝特公羅卜藏等各令豫備得旨依議今總兵路振聲見率標兵前往路振聲係諳練行間之人朕所稔知如策妄阿喇布坦兵少此兵足以制之彼若擁眾而來我兵似覺不足必須詳加籌畫相

機而行著速行文提督至爾等所議三處兵派一大臣總統調度此兵乃西安將軍所管之官將軍親往不便又令大臣管轄應派一能辦事大臣與將軍公同商酌而行著吏部尚書富甯安馳驛前往派新滿洲侍衛十員前往效力見派法腦著隨富甯安前去祁里德原係大臣著授爲散秩大臣馳驛前往推河亦派新滿洲侍衛前往著將呢牙韓楚婁徵額派出隨去厄魯特巴爾虎侍衛官員亦令挑選帶往○庚辰徵外藩兵集歸化城以右衛將軍費揚固總理軍務○壬午予故原任漕運總督卽廷極祭葬諡溫勤○甲申甘肅提督師懿德奏駐防哈密遊擊潘至善筆帖式常保住等於三月二十六日率領官兵二百餘人同哈密白克額敏擊敗策妄阿喇布坦於哈密賊退駐城南二十里外得旨官兵甚少輒奮往爭先殺退二千餘賊深爲可嘉所有在事及受傷陣亡官

兵哈密兵應行賜卹之處該部速議具奏尋兵部議覆應遣臣部

司官及理藩院司官各一員於甘肅巡撫處領帑銀一萬五千兩

往哈密賞賜白克額敏遊擊潘至善以下及陣亡受傷兵丁等事

定日其應議敘及加恩兵丁處一併議奏從之○予故原任吏部

尚書徐潮祭葬○乙酉以荆山署倉場侍郎

由禮部右侍郎署

○丁亥命

費揚固帥師駐推河○己丑諭議政大臣等朕經歷軍務年久且

曾親統大兵出塞征討凡行兵機務靡不周知今欲用兵兵非不

敷但慮路遠運餉殊難誠能輓輸無誤令全軍得至策妄阿喇布

坦之地朕心始慰此兵多係從前在昭莫多烏闌布通屢經對敵

之兵且人人懷報效之志若策妄阿喇布坦來戰不論何地制勝

有餘再若由噶斯路進兵一萬赴伊里河源抵彼巢穴由哈密吐

魯番進兵一萬由喀爾喀進兵一萬前至博克達額倫哈必爾漢

地方如此三路進剿料必成功但其間進止又在臨時相機而行未可豫定爾等雖未身歷軍旅既爲國家大臣於議此等要事時當詳審籌度務合機宜非可視同泛常也○辛卯 上奉 皇太后避暑塞外啟鑾○甲午肅州總兵官路振聲奏策妄阿喇布坦遁去○乙未 上駐蹕遙亭 皇四子和碩雍親王入見 上籌及西邊用兵之計 皇四子和碩雍親王奏曰當日天兵誅殛噶爾丹時卽應將策妄阿喇布坦一同剿滅但伊畏罪懾服備極恭順是以特賜生全今乃漸肆狂悖居心險詐背負 聖恩種種不恭至於侵擾我哈密干犯王章於國法難以寬貸自當用兵撲滅以彰天討 上深然之○命富甯安分兵戍噶斯口

五月己亥 上駐蹕熱河○庚子宗人府議奏護軍校賴圖庫妻叩闕告多羅順承郡王布穆巴以 御賜鞍馬給優人乘坐雖在

赦前但肆意妄行有玷王爵應革退從之○甲辰諭理藩院聞被雪各蒙古因朕贍濟並未傷損一人朕甚喜悅蒙古等已知捕魚可將魚船及網給與伊等令其仍在澤捕魚而食將所給米糧節省畱以度冬又所給牲畜不久蕃息即可漸致富饒矣○諭議政大臣等哈密爲策妄阿喇布坦所侵恐不能生理著甘肅巡撫遣官運送米糧牛羊往賑○丙午 上手書諭諸大臣等聞黑龍江將軍楊福已故朕心軫惻伊人材壯健且係爲君爲國捨身效力之臣將軍之任甚屬緊要伊子三官保爲人甚孝住彼已久熟悉地方情形目今雨水之時家口不可行著十月內來此時著三官保署理俟伊父喪同時奏明再行定奪寫此旨時不覺潸然淚下○賜故黑龍江將軍鎮國公楊福銀一千兩命散秩大臣和碩額駙尙崇義乾清門侍衛傅森等馳驛往弔予祭葬諡襄毅○己酉

命肅州總兵官路振聲駐防哈密○庚戌文華殿大學士溫達卒
遣皇子允禔及大臣二員侍衛二十員奠茶酒予祭葬諡文簡○
王子議政大臣等奏遵旨訊被擒厄魯特滿濟據稱我本圖爾古
特人我阿玉奇汗之子三濟扎布當年與父有隙率一萬人投策
妄阿喇布坦策妄阿喇布坦擒三濟扎布送還圖爾古特盡畱我
等萬人分給伊屬下寨桑等其來侵哈密之故曾聞年老準噶爾
人言去年喀爾喀擒我處阿爾泰打牲一人殺三人又我處貿易
之人爲哈密人阻截以此欲蹂躪哈密使之殘困其人眾每一部
落有千五百戶約共三萬人其徵賦俱無定規凡有所需一切向
屬下欽取人皆疲敝自和碩特圖爾古特輝特杜爾伯特台吉屬
人外策妄阿喇布坦十四部落之人無不怨之去年雪深三尺餘
其所居伊里等地方牲畜盡斃其子往攻安箭地方之布魯特被

殺者五百人回時又多染疾而死再我圖爾古特一萬餘人俱愁
苦度日各有戀土之心常思乘變奔回本地或來歸 天朝其來
侵哈密眾人皆言策妄阿喇布坦不知自量輕犯 天朝若大兵
來討何以待之妖孽已見猶不耕食安生甚無謂也奏入得旨策
妄阿喇布坦處著遣使分兩路齎諭旨前往將喀爾喀所獲之厄
魯特著隨哈密路使臣去哈密所獲之厄魯特著隨喀爾喀路使
臣去○乙卯遣原任員外郎保住藍翎克什圖各齎諭旨往策妄
阿喇布坦處諭曰去年爾眾擅掠我喀爾喀之人故喀爾喀巡哨
之兵追逐殺爾打牲一人擒一人而歸我哈密之往吐魯番貿易
者因爾亦不令回故從吐魯番處行文與爾不知曾接到否今爾
無故領兵二千侵我哈密爲我兵二百人所敗而遁今我兵已四
路雲集斷難中止從前爾雖狂妄啟奏朕爲天下主無不寬容况

爾曾奏云今我等喀爾喀厄魯特青海之眾皆復舊業以安人眾
爾今可令和碩特圖爾古特輝特之人俱回原處與伊兄弟完聚
其在我處之輝特朕亦令回原處完聚於阿拉克山居住拉藏汗
之子爾可速送還拉藏爾止領準噶爾之眾僻在額爾齊斯居住
則已再前給爾準噶爾之眾本我所應有之人彼等亦不願屬爾
處爾之人心離異各爲身計不但眾人皆知卽爾亦自知之爾果
欲起兵此等人朕皆當收養誰不欲享太平乃肯爲爾冒死耶況
我用兵並無掩襲爾常自以爲強可親身前來會盟定議不然恐
爾又詭稱使臣不能盡達爾言也前爾屢奏所遣使人中途爲人
阻隔朕因遣使約爾來會爾又懇奏戶口無幾原不足數且僻在
一隅若相近邊境有可效力之處情願報效今何無端食言侵我
哈密若不來會盟斷無了期兵興之際受傷生齒必多爾若畏懼

不來則爾向稱欲安人眾之言皆爲虛僞朕必親征或令王大臣等領兵直抵爾巢穴必不容爾信口枝梧也爾其定議卽於所遣使臣同時具奏○戊午諭議政大臣等策妄阿喇布坦無故侵我哈密今大兵進討應行文曉諭鄂羅斯邊界地方楚庫拜姓城之頭目令其加意防守邊界如有策妄阿喇布坦之人投向爾處卽宜收畱授內閣侍讀品級圖禮琛從前往圖爾古特時路經鄂羅斯熟識彼處頭目可著前往○以李華之爲刑部右侍郎

由左副都御史

遷

○辛酉以順承恭惠郡王勒克德渾庶出子杭州將軍諾羅布

襲多羅順承郡王○壬戌以郝林爲左副都御史

由宗人府府丞遷

○奉

差江南審事尙書張鵬翮等奏參江蘇巡撫張伯行屢奏海中有賊令其回奏疏內假捏巧飾奸欺殊甚已故張元隆案內船戶余元亨等張伯行必欲陷爲海賊五年不結夾斃十二人破家者不

知凡幾卽監犯之存活者亦以拖累日久疾病冤號者甚多今已遵旨釋放其在赦後者俱於張元隆等案內分別定罪得旨張伯行著革職看守審理

六月壬申命都統圖思海侍郎艾芳曾等往湖灘河朔運糧○甲戌西安將軍席柱吏部尙書富甯安遵旨議奏吐魯番與哈密接壤且係策妄阿喇布坦咽喉要地不可不先取沿途安站運米之事應於布隆吉爾巴爾庫爾兩處各設兵五百名大兵喂養馬匹五十日於七月二十日起程八月十五日前後至巴爾庫爾地方休養馬匹數日從哈密北大山後烏闌烏蘇路進兵九月初五六日間到吐魯番相機剿撫平定吐魯番後招安索爾通等處回子一面通知哈薩克布魯特卽策妄阿喇布坦親來亦可剿滅吐魯番旣平再相機近剿策妄阿喇布坦奏入 上諭議政大臣等覽

富甯安席柱所奏今年進兵取吐魯番等語若在甘肅等處將馬匹喂養肥壯於九月間方取吐魯番則時值冬令且伊地方太近不如仍照原議明年前進爲當祁里德處信息亦應等候再策妄阿喇布坦曾有秋天兵至哈密之語總兵官路振聲之兵止有一千力量單弱西安之兵旣在甘肅等處喂養馬匹著將甘肅提標營兵二千添發路振聲處○戊寅命富甯安席柱帥師駐巴爾庫爾○庚辰甘肅巡撫綽奇奏蘭州等十八處旱災 上諭大學士等甘肅地方被災之民應作何賑濟著九卿詹事科道會同速議具奏賑濟饑民之事較之征剿策妄阿喇布坦更爲緊要爾等可速傳諭○乙酉諭大學士等甘肅巡撫綽奇上言固原等十八處今歲旱災未完額賦請分年帶徵朕思災民逋賦卽帶徵亦力難完納其悉行蠲免○丁亥以噶什圖爲西安巡撫

由山東布政使遷

○兵

東華錄

康熙九十五

上

部尙書孫徵灝卒賜鞍馬二匹散馬二匹銀五百兩○壬辰遣副都御史明安往賑蘭州等十八州縣衛所饑